



PLED SIN VIA

Tschuncheismas – ina biala fiasta

LUCIA WICKI-RENSCH

Igl usit sco el ei enconuschents en Tiaratudestga, ella Baviera, da saltar da Tschuncheismas entuorn la plonta da matg, enconuschevan nus da mattatschas strusch. Schegie che la fiasta da Tschuncheismas ei suenter la fiasta da Pastgas la pli impurtonta dalla Baselgia, ein mo paucs usits vegni dai vinavon. Era la schinumnada historia dil «pasler da Tschuncheismas», scretta tenor gl'enconuschent scribent e cabaretist svizzer *Franz Hohler*, veva buca anflau in plaz en nossa stivetta. Quei pasler dueva numnadamein metter sin il sem dalla fenestra in pastget che vegneva duvraus da far igniv. Darar anflava ina casarina quella frastga.

Il simbol dalla columba alva, il simbol dil Spért Sogn che significava sia vegnida, lez ei restaus cun sia ferma muntada ed ei a nus fetg enconuschents.

En mes giuvens onns erel jeu fascinada da quella fiasta nua ch'ils giuvnals da siu temps haveven retschiert a Jerusalem il Spért Sogn ed in e scadin dad els vegnevan da capir in l'auter en lur agen lungatg.

Con bugen vess jeu capiu differents lungatgs senza stuer far memia bia stentas. Mo cun in tec engaschi e paucas breigias eis ei la fin finala gartegiau a mi buca

«Con bugen vess jeu capiu differents lungatgs senza stuer far memia bia stentas.»

mal dad emprender bein enqual lungatg jester.

Tgei muntada ha quella biala fiasta solemna che nus festivein 50 dis suenter Pastgas e che vegn era numnada la naschientscha dalla Baselgia?

Da gliez temps ha Dieus tar-mess als emprems 120 suc-

cessurs da Jesus il Spért Sogn ed el ei sederasaus sur digl entir mund.

Tenor la historia dils apostels 2.41 savein nus leger ch'igl apiestel Pieder perdegava quei di per l'emprema gada publicamein la buna nova digl evangeli. Mellis e mellis eran serimnai a Jerusalem e vegnevien plein meraviglias sperasvi per veser quei spectacel. Il diember dils successurs carscheva pli e pli. Aschia ei lur communitad carschida sin 3000 personas. Fertion ch'ils apostels serimnaven suenter la mort da Jesus plitost el zuppau, ei quei stau l'emprema gada ch'els han dau perdetga publicamein. Aschia ei nossa historia semidada.

Referend sin la brev digl apiestel Paulus als Gallaters 5,22–23 ei il fretg dil Spért Sogn la carezia, il plascher, l'amicabladad, la beinvuglientscha, la dultschezia, la buontad, la pazienza, la curascha e la tempronza.

Bunas vertids che simboli-sescha la columba alva, numnada era la columba dalla pasch.

Lucia Wicki-Rensch è naschida e creschida si a Trun. Ella s'engascha dapi 22 onns tar l'organisaziun «Kirche in Not», ina ovra caritativa internaziunala per las baselgias en miseria e per ils cristians persequitads sin l'entir mund.

En collavuraziun cun RTR publitgescha la FMR adina en la davosa ediziun da gasetta da l'emna il «Pled sin via». Quel è alura era d'udir mintgamai la dumengia tar RTR, en l'emissiun «Vita e cretta».